



# ACTA DO PLENO DA CORPORACIÓN

## SESIÓN EXTRAORDINARIA DO 14 DE XUÑO DE 2018.

### ASISTENTES:

#### Alcalde- Presidente:

José Luis Oujo Pouso (PP)

#### Concelleiros:

María José Maneiro Quintáns (PP)

José Manuel Deán Pouso (PP)

Juan Jesús Pérez Santos (PP)

M<sup>a</sup> Magdalena Pérez Millares (PP)

Antonio Romero Ribeiro (PP)

Joaquín García García (PP)

Luis García Gacío (PSdG- PSOE)

M<sup>a</sup> Asunción Torres Parada (Portodos)

José Ángel Lorenzo Vila (Portodos)

M<sup>a</sup> Ánxela Franco Pouso (BNG)

David Barrio Alonso (BNG)

#### Secretario:

José Manuel González García.

Na localidade de Porto do Son (A Coruña), sendo as **20:10 horas** do día **14 de xuño de 2018**, no Salón de Actos da Antiga Casa Consistorial, reúnese o Pleno da Corporación Municipal en **sesión extraordinaria**, previamente convocada, baixo a presidencia do Sr. Alcalde- Presidente, D. José Luis Oujo Pouso, coa asistencia dos Sres. concelleiros que se relacionan á marxe.

Non asisten D<sup>a</sup>. Josefa M<sup>a</sup> Hermo García (PSdG- PSOE) nin D<sup>a</sup>. M<sup>a</sup> Asunción Torres Parada (Portodos).

A Corporación está asistida polo secretario da Corporación, D. José Manuel González García, que dá fe do acto.

Tamén asiste a interventora do concello, D<sup>a</sup>. M<sup>a</sup> Mar Lirola Delgado.

Unha vez verificada polo secretario a válida constitución do Pleno, dado que se cumpre a asistencia mínima dun terzo do número legal de membros da Corporación, o Alcalde- Presidente abre a sesión.

De seguido o Alcalde- Presidente procede á deliberación e votación dos asuntos incluídos na **ORDE DO DÍA:**

A) PARTE RESOLUTIVA.

- 1.- Modificación de usos urbanísticos de parcelas de equipamento comunitario (antigas escolas unitarias de Carballosa e Novás).
- 2.- Aprobación provisional da modificación das Ordenanzas fiscais nº 1, reguladora do imposto sobre os bens inmobles, e nº 4, reguladora do imposto de actividades económicas.
- 3.- Aprobación dun Convenio de colaboración co Concello de Riveira para a execución dun obradoiro dual de emprego

\*\*\*\*

**1. MODIFICACIÓN DE USOS URBANÍSTICOS DE PARCELAS DE EQUIPAMENTO COMUNITARIO (ANTIGAS ESCOLAS UNITARIAS DE CARBALLOSA E NOVÁS).**

O Sr. secretario dá lectura á proposta da Alcaldía, que é do seguinte teor literal:

**"PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción da seguinte resolución, non obstante resolverá o que estime conveniente:

**"ANTECEDENTES**

**Primeiro.-** O Concello de Porto do Son, ao abeiro das competencias que ten atribuídas polos arts. 25 e 26 da Lei 7/1985, do 2 de abril, reguladora das bases do réxime local, pretende executar os proxectos "Acondicionamento da parcela da antiga escola unitaria de Novás para dedicala a usos públicos: aparcadoiro" e "Acondicionamento da parcela da antiga escola unitaria de Carballosa: aparcadoiro".

Nos dous casos, os proxectos contemplan a demolición dos edificios das antigas escolas unitarias e o acondicionamento da parcela resultante para destinala ao uso público de aparcadoiro.

**Segundo.-** As parcelas nas que se sitúan a antiga escola unitaria de Novás (referencia catastral 001804900MH91H0001KM) e a antiga escola unitaria de Carballosa (referencia catastral 001402500MH91H0001BM) teñen atribuídas polo Plan Xeral de Ordenación Municipal as seguintes clasificacións e cualificacións urbanísticas:

- Escola unitaria de Novás (001804900MH91H0001KM): "solo de núcleo rural común. Grao 3", cualificada como "uso dotacional – clase Educación".
- Escola unitaria de Carballosa (001402500MH91H0001BM): "solo de núcleo rural común. Grao 2", cualificada como "uso dotacional – clase Educación".



**Terceiro.-** A implantación de aparcadoiros públicos en senllas parcelas require modificar o uso urbanístico que lles foi atribuído polo planeamento xeral, de xeito que o uso que teñan sexa o definido como “uso dotacional – clase Servizo público. Categoría 22 (outros)”.

O uso dotacional “servizo público. Categoría 22 (outros)” defínese no PXOM como: *“instalacións públicas ou privadas que presten algún tipo de servizo non incluído nalgún dos anteriores e que non poidan ser incluídos dentro de usos comerciais. Poden incluírse nesta Subsección xenérica os recintos feirais, espazos relacionados con actividades esporádicas ou continuadas das persoas, sen carácter sanitario ou residencial, ou co coidado ou a garda de animais, centros de desinfección de gando ou outros análogos. Tamén quedarán recollidos dentro desta categoría en tódalas clases de solo aquelas edificacións, en xeral de pequena dimensión, que presten ou poidan prestar servizos á comunidade ou a un grupo de usuarios, e que en todo caso non sexan de aproveitamento exclusivo para o seu titular, que non se atopen recollidos noutros apartados, como pode ser o caso de muíños, fomos, fontes, lavadoiros, etc”.*

### FUNDAMENTOS DE DEREITO

**Único.-** O art. 45.2 da Lei 2/2016, do 10 de febreiro, do solo de Galicia habilita aos concellos para modificar o uso atribuído aos equipamentos públicos sen necesidade de modificar puntualmente o Plan Xeral de Ordenación Municipal ao establecer que *“o concello en pleno, por maioría absoluta e sen necesidade de seguir o procedemento de modificación do plan, poderá acordar o cambio de uso dos terreos reservados para equipamentos públicos por outro uso dotacional público distinto, sempre que se manteña a titularidade pública ou se destine a incrementar as zonas verdes ou os espazos libres públicos”.*

De xeito idéntico se pronuncia o art. 65.7 do Decreto 143/2016, do 22 de setembro, aproba o Regulamento da lei 2/2016, do 10 de febreiro, do solo de Galicia.

Visto canto antecede, **ACORDA:**

**Primeiro.-** Modificar o uso atribuído polo Plan Xeral de Ordenación Municipal ás parcelas que se indican a continuación, que será o que se indica:

- Parcela con referencia catastral 001804900MH91H0001KM (escola unitaria de Novás): “uso dotacional – clase Servizo público. Categoría 22 (Outros)”.
- Parcela con referencia catastral 001402500MH91H0001BM (escola unitaria de Carballosa): “uso dotacional – clase Servizo público. Categoría 22 (Outros)”.

**Segundo.-** Dispor a publicación deste acordo nos diarios oficiais que procedan para o seu coñecemento e aos efectos oportunos.”

Porto do Son, 7 de xuño de 2018.

O Alcalde- Presidente,  
Asdo. José Luis Oujo Pouso.”

D. Luis García Gaciño anuncia a abstención do grupo socialista, indicando que o acordo é un mero trámite para materializar os proxectos de derruba das escolas incluídos no POS.

Doutro lado, sinala que cando o grupo socialista trouxo a súa proposta sobre as escolas ao Pleno, nunha xuntanza mantida na Alcaldía, díxoselles que se consensuarían os usos a darlle ás parcelas; despois daquela reunión, a seguinte noticia que tiveron sobre o asunto foi a inclusión

no POS da obra de derruba das escolas unitarias sen valorar cal sería ou uso das parcelas resultantes, o que considera un despilfarro.

D. José Ángel Lorenzo Vila non fai uso da súa quenda de palabra.

D<sup>a</sup>. María Ánxela Franco Pouso dubida da urxencia deste asunto que, di, ben podería incluírse na sesión ordinaria.

En relación co dito polo voceiro do PSdG- PSOE, indica que o lóxico, se se inclúen as obras de demolición das escolas unitarias no Plan Único, é ter en conta os seus usos urbanísticos. Tamén agarda que as derrubas sirvan para algo e que formen parte dun plan, e indica que se lle podería ceder un departamento nas edificacións á Comunidade de Montes en Man Común de San Pedro de Muro, como se lle dixo no seu momento.

Doutro lado, a voceira nacionalista afirma que o goberno municipal fixo o que quixo coas figuras urbanísticas, pois incluíu usos como o das escolas unitarias en terreos da Comunidade de Montes. Engade que, se non se van facer aparcadoiros nas parcelas, debería pensarse en algo semellante.

A Sra. Franco Pouso remata a súa intervención demandando que se lle aclares se se mantén o compromiso adquirido co Comunidade de Montes de San Pedro de Muro, se a actuación de derruba das escolas unitarias contempla unha segunda fase e porque non se contemplou o uso urbanístico que se lle pretende dar ás parcelas no PXOM.

D<sup>a</sup>. María José Maneiro Quintáns sinala que as actuacións nas escolas unitarias estaban incluídas no POS Complementario e onte se incluíu a actuación prevista en Novás no POS Adicional. Engade que é preciso adoptar este acordo para que o proxecto poida executarse e explica que o acordo consiste en mudar o uso educativo por outro máis xenérico.

Prosegue explicando que a actuación pretendida responde a que se elaborou un informe avaliando o estado dos inmobles para preparar a súa cesión ás Comunidade de Montes de San Pedro de Muro, que concluíu que, dadas as patoloxías que presentaban, era máis caro arranxalas que edificar outros novos. Por ese motivo, optouse por demoler as edificacións para destinar as parcelas a outras actividades máis xenéricas.

A Sra. Maneiro Quintáns rógalle ao grupo do PSdG- PSOE que aclare a súa postura, pois foi quen solicitou a demolición e agora di que se absterá. Tamén lle indica que, de querer unha segunda fase de actuacións, fagan propostas ao respecto pois ata o de agora non as recibiron.

Conclúe a súa intervención reiterando que o informe técnico indicaba que non había risco de colapso das edificacións pero que non resultaba economicamente viable a súa rehabilitación.

D. Luis García Gaciño di descoñecer cando se pronunciou o seu grupo a favor da derruba das antigas escolas unitarias; o grupo socialista só alertou sobre a situación das edificacións pero non pediu a súa demolición.

O Sr. Alcalde- Presidente pídelo ao voceiro socialista que revise as actas e o Sr. García Gaciño pídelo que non o interrompa.

Pídelo de novo o Sr. Alcalde- Presidente que revise as actas das sesións, pois dixo que as edificacións representaban un risco para as persoas e solicitaban a súa derruba, mentres que agora cualifica a actuación como un despilfarro.



D. Luis García Gaciño afirma que non precisa revisar as actas das sesións para saber o que dixo sobre este asunto. Engade que lle parece un despilfarro que se gasten fondos na demolición duns edificios se non hai previsto darlle un uso rendible ás parcelas.

O Sr. Alcalde- Presidente pregúntase por que, entón, D<sup>a</sup>. Josefa M<sup>a</sup> Hermo García dixo que se aledaba de que se levasen ao Pleno estas actuacións e que iso fora posible grazas á súa insistencia.

D. Luis García Gaciño sinala que, se as parcelas se van destinar a aparcamentos lle parece ben, pero vai absterse.

O Sr. Alcalde- Presidente explica que o destino a un uso público é unha esixencia da Deputación Provincial.

D. Luis García Gaciño reitera que se vai abster na votación.

D<sup>a</sup>. María Ánxela Franco Pouso indica que non respostaron ás súas preguntas e que non que non é certo que as parcelas tivesen un uso dotacional, como dixo a Sra. Maneiro Quintáns, pois na documentación figura como uso "educativo".

D<sup>a</sup>. María José Maneiro Quintáns intervén sinalando que o uso é "dotacional educativo".

D<sup>a</sup>. María Ánxela Franco Pouso continúa a súa intervención mencionando que lle reprocharon aos grupos da oposición que non fan propostas pero o BNG non estivo presente na reunión á que aludiu o Sr. Alcalde, pero tampouco lle preguntaron. En relación co informe que dicía que as escolas estaban en risco de derruba, pide que lle digan a súa data; engade que leva anos sobre a mesa do goberno municipal.

D<sup>a</sup>. María José Maneiro Quintáns aclara que o informe técnico non mencionaba que houbera risco de colapso, que iso o din os Sres. García Gaciño e Franco Pouso.

O Sr. Alcalde- Presidente indica que o informe se redactou en 2015 ou 2016.

D<sup>a</sup>. María Ánxela Franco Pouso pregúntase en que situación estarán as edificacións actualmente se fai xa 4 anos un informe técnico indicaba o seu mal estado; engade que, en caso de tratarse de edificacións dun particular, xa terían un expediente aberto. En todo caso, considera axeitada a demolición e está de acordo con ela.

Por outra banda, a voceira do BNG pregunta por que, posto que se as demolicións se van incluír no POS Adicional e van quedar dúas parcelas que se poderían destinar a parques infantís, se incluíron 23.000 euros para comprar unha parcela xunto ao bar "Chuca" para ese mesmo fin. Pide que lle aclaren esta cuestión pois non lle parece que teña senso investir para unha demolición, acadando un solar, e logo gastar 23.000 euros na compra dunha parcela.

O Sr. Alcalde- Presidente apunta que non entende que, sendo deputada provincial, a Sra. Franco Pouso faga as preguntas que formulou, e explica que a modificación do uso urbanístico das parcelas é unha esixencia da Deputación Provincial e que o trámite ten que achegarse á plataforma de tramitación de subvencións como moi tarde mañá.

Tamén afirma que a Sra. Franco Pouso non entende as súas propostas porque non vai falar cos veciños xa que, neste senso, é unha demanda dos veciños de San Pedro de Muro facer un parque xunto ao bar "Chuca".

Continúa a súa intervención pedíndolle á voceira nacionalista que se aclare, pois di que a derruba é boa pero é unha mala opción mercar unha parcela e pregúntase que problema hai en mercar unha parcela; afirma que para o goberno municipal non representa ningún problema pois é unha demanda veciñal que se faga un parque infantil nesa zona.

Di o Sr. Alcalde- Presidente que, fagan o que fagan desde o goberno municipal, sempre os van criticar e pídelle aos grupos da oposición que traballen escoitando aos veciños pois van 3 anos de mandato e nin unha proposta da oposición recibiron. Indica que se lle pediron propostas nunha xuntanza que mantiveron no seu despacho e lle contestaron "fagan vostedes as propostas e xa decidiremos nos se son boas".

D<sup>a</sup>. María Ánxela Franco Pouso afirma que na reunión que menciona o Sr. Alcalde só debeu estar el e que minte. Tamén sinala que no goberno municipal hai 5 persoas con dedicacións e sempre agardan ao último minuto para tramitar os asuntos, e engade que fai pouco asinou na Deputación Provincial un convenio que tiña o mesmo erro, motivo polo que tivo que acompañalo o Sr. secretario.

A Sra. Franco Pouso, doutro lado, di que é un éxito facer un parque infantil nun cruce de estradas, algo que como nai non entende, do mesmo xeito que foi un éxito o parque infantil de Portosín á beira da estrada e no que, incluso, se accidentaron coches.

Sinala a voceira do BNG que o se Sr. Alcalde di que non fan propostas pero o certo é que nin sequera inclúe na orde do día as mocións que presentan en tempo e forma; tamén pediron que lles enviaran por correo electrónico os decretos e contestáronlles negativamente. Conclúe previndo ao Sr. Alcalde para que mude o seu xeito de actuar, non vai ser que pase á oposición, aínda que nese caso ningún dos outros grupos políticos actuaría con el como el o fai.

O Sr. Alcalde- Presidente pídelle á Sra. Franco Pouso que non mencione as dedicacións, pois ela cobra máis cós 5 xuntos.

Continúa explicando que acudiu co Sr. secretario á Deputación Provincial, onde foron moi ben atendidos tanto polo deputado compañeiro da Sra. Franco Pouso responsable dos plans provinciais, ao que están moi agradecidos, como polos funcionarios provinciais. Tamén lle pregunta ao Sr. secretario se é coñecedor dalgún problema co convenio ao que aludiu a voceira do BNG.

O Sr. secretario di que descoñece calquera tipo de problema e que non lles notificaron nada ao respecto.

D<sup>a</sup>. María Ánxela Franco Pouso pregunta se non houbo ningún problema coa clasificación urbanística dos terreos dese convenio.

O Sr. secretario explica que non houbo ningún problema de tipo urbanístico nin houbo que mudar ningunha cualificación urbanística, aínda que houbo que agardar a obter as autorizacións sectoriais para que se aprobase o convenio.

Non habendo intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con catro (4) abstencións (1 PSdG- PSOE+ 1 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.



## **2. APROBACIÓN PROVISIONAL DA MODIFICACIÓN DAS ORDENANZAS FISCAIS Nº 1, REGULADORA DO IMPOSTO SOBRE OS BENS INMOBLES, E Nº 4, REGULADORA DO IMPOSTO DE ACTIVIDADES ECONÓMICAS.**

O Sr. secretario dá lectura á proposta da Alcaldía, que é do seguinte teor literal:

"D. JOSE LUIS OUJO POUZO, ALCALDE-PRESIDENTE DO CONCELLO DE PORTO DO SON, PROPÓN AO PLENO CORPORATIVO O SEGUINTE:

Visto a providencia de Alcaldía de data 8 de xuño de 2018, para aprobar as modificacións das Ordenanzas Fiscais nº 1 e nº 4 do Imposto de Bens Inmobles e do Imposto de Actividades Económicas.

Esta Alcaldía RESOLVE, elevar ao Pleno da Corporación a adopción dos seguintes acordos:

**PRIMEIRO:** Aprobación inicial das modificacións das ordenanzas fiscais do Imposto sobre Bens Inmobles e do Imposto de Actividades Económicas, nos seguintes termos:

1) Ordenanza fiscal Nº 1 do Imposto sobre Bens Inmobles

En relación co artigo 14º relativo a Bonificacións se propón incluír a seguinte bonificación como apartado 5, renumerándose os apartados 5 e 6 do mencionado artigo da vixente ordenanza pasando a ser os apartados 6 e 7 respectivamente mantendo o seu contido salvo no relativo o órgano competente para a súa resolución que no caso do novo apartado 5 xa se pon expresamente que será o Pleno polo voto favorable da maioría dos seus membros e nos seguintes casos se mantén a referencia a Xunta de Goberno Local.

Polo tanto o apartado 5 queda redactado como segue:

*" Sempre que así se solicite polos interesados, establécese una bonificación de ata o 95% da cota íntegra do imposto a favor de inmobles urbanos nos que se desenvolvan actividades económicas que sexan declaradas de especial interese ou utilidade municipal por concorrer circunstancias de fomento do emprego, regulada no artigo 74.2 quáter do Real Decreto Legislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais. A gradación da porcentaxe de bonificación aplicarase do seguinte xeito:*

- a) *Ata 95% pola creación de máis de 20 postos de traballo*
- b) *75% pola creación de entre 11 e 20 postos de traballo*
- c) *50% pola creación de ata 10 postos de traballo*

*Esta bonificación será de aplicación unicamente a aqueles inmobles nos que teña lugar a implantación dunha nova actividade económica ou empresarial, así como a aqueles outros nos que se amplíen as instalacións sempre e cando implique a creación de emprego. Neste último caso, a bonificación aplicarase unicamente sobre o valor da ampliación.*

*Corresponderá dita declaración ao Pleno da Corporación e acordarase, previa solicitude do suxeito pasivo, polo voto favorable da maioría simple dos seus membros.*

*Dita bonificación aplicarase durante 3 exercicios económicos, debendo manterse en todos eles as condicións esixidas que serviron de xustificación para o seu outorgamento.*

*Para a concesión desta bonificación deberán concorrer os seguintes requisitos:*

*i) Requisitos relativos ao inmovible:*

- A titularidade do dereito polo que se solicita a bonificación debe corresponder a persoas físicas ou xurídicas ou ás entidades a que se refire o artigo 35.4 da Lei Xeral Tributaria que desenvolvan en dito inmovible a actividade económica declarada de especial interese municipal por creación de emprego. Por tanto deberá coincidir o suxeito pasivo do Imposto co empregador dos correspondentes traballadores.*
- Non se aplicará esta bonificación a máis dun inmovible do suxeito pasivo.*
- No caso de que o inmovible se tivera agrupado, segregado ou sufrise algún tipo de alteración de orde física no período impositivo da solicitude da bonificación que produza una alteración do valor catastral, dita bonificación non se aplicará ata que o Concello dispoña do novo valor catastral do inmovible no que se desenvolve a actividade económica declarada de interese.*

*ii) Requisitos relativos ao suxeito pasivo*

- Esta bonificación poderá aplicarse tanto a empresas de nova creación como ás xa existentes.*

*iii) Requisitos relativos aos traballadores contratados:*

- Computaranse unicamente os novos empregos directos, tanto a xornada completa como reducida. Neste último caso, os novos empregos computaranse en proporción á duración da xornada.*
- Os contratos haberán de manterse, xunto coa media de traballadores da empresa, por un período mínimo de tres anos.*
- Non dará dereito á bonificación as contratacións de traballadores que procedan de traslados ou diminucións de plantillas ou postos de traballo doutros centros do suxeito pasivo do seu grupo no termo municipal de Porto do Son. En caso de fusión, absorción, cambio de denominación ou similares, non darán dereito á bonificación as contratacións de traballadores que xa dispuxeran de contrato laboral nunha empresa afectada por este tipo de procesos.*
- Os traballadores deberán ter como destino principal ou lugar no que desempeñen a totalidade ou meirande parte do seu traballo, o inmovible para o que se solicita a bonificación.*
- Incremento do número de traballadores con contrato establecerase como diferenza entre o número de traballadores existente na empresa un ano antes ao momento da solicitude do beneficio fiscal e o existente o ano previo ao anteriormente indicado.*

*A bonificación haberá de solicitarse no período impositivo seguinte á creación dos postos de traballo computables para os efectos deste beneficio fiscal, unha vez que transcorrese polo menos un ano desde a creación do último posto de traballo computable.*

*Xunto coa solicitude de bonificación, o interesado achegará a seguinte documentación:*

- Memoria explicativa, integrada por una descrición da actividade a desenvolver, e que comprenderá unha análise da súa viabilidade.*
- Copia dos novos contratos formalizados*
- Declaración dos empregos preexistentes, detallando a seu número e modalidade da xornada.*



- *Última relación nominal de traballadores remitida á Tesouraría Xeral da Seguridade Social antes da creación do primeiro dos postos de traballo computados, consistente ca declaración do punto anterior.*

*A bonificación terá efectos no período impositivo seguinte ao da solicitude, excepto o indicado na continuación para novas construción ou ampliación de construcións preexistentes.*

*Para o desfrute da bonificación en exercicios sucesivos o interesado deberá aportar a seguinte documentación dentro do mes de decembro do primeiro, segundo e terceiro exercicio:*

- *Última relación nominal de traballadores remitida pola empresa á Tesouraría Xeral da Seguridade Social.*

*Na ampliación de construción preexistentes, o beneficio comezará a desfrutarse no exercicio seguinte ao de entrada en vigor do valor catastral modificado, constituíndo a base da bonificación o incremento de valor consecuencia da ampliación.”*

O apartado 6 queda redactado como segue: “As solicitudes de bonificacións, previo informe técnico, serán resoltas pola Xunta de Goberno Local, agás as establecidas no apartado 5 que serán resoltas polo Pleno”.

## 2) Ordenanza fiscal Nº 4 do Imposte de Actividades Económicas

Engadir o artigo 6º co título Bonificacións que queda redactado como segue:

*“Sempre que así se solicite polos interesados, establécese una bonificación de ata o 95% da cota correspondente para suxeitos pasivos que tributen por cota municipal e que desenvolvan actividades económicas que sexan declaradas de especial interese ou utilidade municipal por concorrer circunstancias de fomento do emprego que xustifiquen tal declaración, regulada no artigo 88.22 e) do Real Decreto Lexislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais. A gradación da porcentaxe de bonificación aplicarase do seguinte xeito:*

- a) *Ata 95% pola creación de máis de 20 postos de traballo*
- b) *75% pola creación de entre 11 e 20 postos de traballo*
- c) *50% pola creación de ata 10 postos de traballo*

*No caso de empresas preexistentes, a bonificación aplicarase sobre o incremento da cota tributaria experimentada como consecuencia da ampliación da actividade.*

*Corresponderá dita declaración ao Pleno da Corporación e acordarase, previa solicitude do suxeito pasivo, polo voto favorable da maioría simple dos seus membros.*

*Dita bonificación aplicarase durante 3 exercicios económicos, debendo manterse en todos eles as condicións esixidas que serviron de xustificación para o seu outorgamento.*

*Para a concesión desta bonificación deberán concorrer os seguintes requisitos:*

### *i. Requisitos relativos aos traballadores contratados:*

- *Computaranse unicamente os novos empregos directos, tanto a xornada completa como reducida. Neste último caso, os novos empregos computaranse en proporción á duración da xornada.*

- Os contratos haberán de manterse, xunto coa media de traballadores da empresa, por un período mínimo de tres anos, contados desde o inicio da actividade.
- Non dará dereito á bonificación as contratacións de traballadores que procedan de traslados ou diminucións de plantillas ou postos de traballo doutros centros do suxeito pasivo do seu grupo no termo municipal de Porto do Son. En caso de fusión, absorción, cambio de denominación ou similares, non darán dereito á bonificación as contratacións de traballadores que xa dispuxeran de contrato laboral nunha empresa afectada por este tipo de procesos.
- Os traballadores deberán ter como destino principal ou lugar no que desempeñen a totalidade ou meirande parte do seu traballo o termo municipal de Porto do Son.

A bonificación haberá de solicitarse no período impositivo seguinte á creación dos postos de traballo computables para os efectos deste beneficio fiscal, unha vez que transcorrese polo menos un ano desde a creación do último posto de traballo computable.

Xunto coa solicitude de bonificación, o interesado achegará a seguinte documentación:

- Memoria explicativa, integrada por una descripción da actividade a desenvolver, e que comprenderá unha análise da súa viabilidade.
- Copia dos novos contratos formalizados
- Declaración dos empregos preexistentes, detallando a seu número e modalidade da xornada.
- Última relación nominal de traballadores remitida á Tesouraría Xeral da Seguridade Social antes da creación do primeiro dos postos de traballo computados, consistente ca declaración do punto anterior.

A bonificación terá efectos no período impositivo seguinte ao da solicitude.

Para o desfrute da bonificación en exercicios sucesivos o interesado deberá aportar a seguinte documentación dentro do mes de decembro do primeiro, segundo e terceiro exercicio:

- Última relación nominal de traballadores remitida pola empresa á Tesouraría Xeral da Seguridade Social.”

**SEGUNDO:** Que se proceda a exposición pública das Ordenanzas coa nova redacción íntegra aprobada, no Taboleiro de Anuncios do Concello durante trinta días, a fin de que os interesados poidan examinala e interpoñer, no seu caso, as reclamacións que estimen oportunas perante o Pleno. O inicio da exposición deberá ser igualmente publicada no BOP.

**TERCEIRO:** Transcorrido o período de exposición pública, e no caso de que non se tivesen interposto reclamacións durante o mesmo, o acordo ata entón provisorio, elevarase automaticamente á categoría de definitivo sen necesidade dun novo acordo Plenario.

No caso de existir reclamacións, o Pleno deberá tomalas en consideración e decidir sobre a súa procedencia.

**CUARTO:** En todo caso, o texto definitivo das Ordenanzas precisará para a súa entrada en vigor publicarse integramente no BOP.

Porto do Son a 8 de xuño de 2018

O Alcalde  
José Luis Oujo Pouso”



D. Luis García Gaciño non fai uso da súa quenda de palabra.

D. José Ángel Lorenzo Vila principia a súa intervención agardando que as bonificacións que se pretenden incluír nas ordenanzas fiscais núms. 1 e 4 se apliquen, pois iso significaría que se están a crear empresas. Doutro lado, sinala que, vistas as porcentaxes de bonificacións previstas, serán as empresas de maior tamaño as máis beneficiadas xa que son as que teñen máis traballadores, pero no seu grupo político opinan que quen obtén máis beneficios máis deben pagar ao fisco.

O voceiro de Portodos continúa detallando que as bonificacións que se pretenden aprobar só se lle aplicarán ás empresas de nova creación ou ás que se amplíen, polo que na súa opinión sería conveniente establecer bonificacións para as empresas que contraten a traballadores, sobre todo a parados de longa duración.

D<sup>a</sup>. María Ánxela Franco Pouso le o parágrafo da providencia da Alcaldía no que se indica que a modificación das ordenanzas fiscais ten a súa orixe no protocolo "Concellos doing business Galicia" e apunta que non atopa similitudes entre ese protocolo e o Concello de Porto do Son. Engade que a que se debate é a segunda "ordenanza pro forma" que se trata, pois desde o goberno municipal fan ordenanzas para o que non se precisa pero non para o que é necesario.

Prosegue a voceira nacionalista indicando que o goberno municipal acostuma a facer ordenanzas que logo non cumpre, pero o BNG leva demandando de xeito reiterado que se aproben bonificacións para as persoas en situación de risco de exclusión social e para que se revise a ordenanza fiscal do lixo, pois Porto do Son é o concello coa taxa máis alta da Mancomunidade "Serra do Barbanza".

Conclúe a súa intervención desexando que se apliquen as bonificacións que se queren aprobar, pero anima ao Sr. Alcalde a que loite por conseguir a creación de solo industrial e revise as ordenanzas fiscais para favorecer ás persoas en situación de risco de exclusión social.

D<sup>a</sup>. María José Maneiro Quintáns explica que o Concello de Porto do Son solicitou a adhesión á iniciativa "Concellos doing business Galicia", que busca favorecer o establecemento de empresas novas en Galicia e no que se contempla o establecemento de bonificacións nos impostos sobre bens inmobles e de actividades económicas. Continúa detallando que, en efecto, se bonifica máis a quen crea máis emprego pero as bonificacións alcanzan a todas as empresas xa que se establecen desde a creación dun posto de traballo.

A Sra. Maneiro Quintáns di que está de acordo co sinalado polo Sr. Lorenzo Vila e quen obtén máis beneficios debe pagar máis impostos e así sucede pois en España hai un sistema fiscal progresivo e solidario. En relación con que deberían establecerse incentivos á contratación de traballadores pola Seguridade Social, sinala que esa é unha cuestión que non compete debater neste Pleno pero, en todo caso, cre que xa existen eses incentivos.

En alusión ao manifestado pola Sra. Franco Pouso, explica que o goberno municipal do que forma parte non foi quen aprobou a ordenanza fiscal reguladora da taxa do lixo nin a suba anual automática de 3 euros.

D. José Ángel Lorenzo Vila sinala que resulta innegable que son as empresas grandes as que obteñen máis beneficios, pero se o 90 % das empresas non teñen máis de 10 traballadores, non lle parece xusto o sistema de bonificacións que se pretende establecer pois serán as grandes empresas as máis beneficiadas por ese sistema.

D<sup>a</sup>. María Ánxela Franco Pouso expresa o seu asombro por que se diga que “o emprego non é cousa nosa” ou “as bonificacións non son cousa nosa”, pois nese caso non entende que están a facer nesta sesión.

A voceira nacionalista pide que lle indiquen onde hai solo adecuado para o establecemento dunha industria e para acadar a creación de 25 empregos.

En relación coa ordenanza fiscal da taxa do lixo, afirma que o seu grupo propuxo en múltiples ocasións o establecemento de bonificacións para as persoas en situación de risco de exclusión social; engade que se a ordenanza fiscal está mal redactada o goberno municipal pode modificala e que nunca dixeron que esa ordenanza fiscal a aprobase o este goberno municipal. Continúa sinalando que o goberno municipal aproba ordenanzas como a das terrazas, que logo non aplica, pero diante das situacións que poden afectar aos veciños non actúa.

A Sra. Franco Pouso, por outra banda, pregúntase onde hai solo axeitado para o establecemento de empresas. Tamén di non entender por que se queren aprobar estas modificacións de ordenanzas cando a pirámide de poboación vai cara abaixo, e insta ao Sr. Alcalde a que dedique tempo para revertir esa situación. Remata a súa intervención sinalando que o BNG aplaudirá estas modificacións de ordenanzas fiscais se chegan a aplicarse.

D<sup>a</sup>. María José Maneiro Quintáns apúntalle á voceira do BNG que non dixo que “a creación de emprego non é cousa nosa”, senón que mencionou que as bonificacións da Seguridade Social non son competencia do concello. Tamén lle indica, en relación coa existencia de solo para uso industrial, que nos núcleos rurais poden establecerse industrias.

En relación co sinalado polo Sr. Lorenzo Vila, a Sra. Maneiro Quintáns indica que, por exemplo, paga máis IBI a empresa que ten a nave de máis valor, que é a empresa máis grande e que, de xeito similar, se bonifica máis a quen crea máis emprego.

D. José Ángel Lorenzo Vila contesta que, en proporción, obtén unha maior bonificación a empresa que é máis grande e esa é unha realidade que a Sra. Maneiro Quintáns coñece pero ten que levar a contraria.

D<sup>a</sup>. María José Maneiro Quintáns afirma que o goberno municipal está comprometido coa creación de emprego e as modificacións das ordenanzas fiscais que se debaten son unha proba.

Fai uso da palabra o Sr. Alcalde- Presidente para indicar que descoñece o que votarán os grupos da oposición pero sabe que non votarán a favor da proposta pois sempre andan co “non é non” e todo o que fai o goberno municipal é malo e semella que non fai nada ben.

En relación coa ordenanza fiscal reguladora da taxa do lixo, apunta que a Sra. Franco Pouso presume de todo o que dixo nun ano e medio no goberno municipal pero modificar esa ordenanza fiscal esquecéuselle. A voceira do BNG forma parte da Asemblea da Mancomunidade “Serra do Barbanza” e sabe ben como se fixo o contrato de recollida e tratamento de residuos; ademais, o BNG foi quen lle deu o apoio ao PSOE para crear a Mancomunidade e aprobar a ordenanza fiscal da taxa do lixo.

O Sr. Alcalde- Presidente tamén di que cando era presidente da asociación de empresarios a Sra. Franco Pouso dicía que as máquinas para facer o parque empresarial ían comezar a traballar inmediatamente. Continúa explicando que cando accederon no ano 2011 ao goberno municipal había unha crise económica tremenda e falta de demanda de solo industrial e por iso non actuaron; agora, que hai demanda das empresas nese senso, é o momento de comezar a



traballar para implantar o parque empresarial e para iso están xa dando pasos. Pola contra, o BNG e o PSOE gobernaron cunha boa situación económica e non fixeron nada ao respecto.

Conclúe a súa intervención o Sr. Alcalde- Presidente sinalando que os grupos da oposición só saben criticar e así son os resultados que obteñen.

Non habendo máis intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con catro (4) abstencións (1 PSdG- PSOE+ 1 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

Intervén D<sup>a</sup>. María Ánxela Franco Pouso para explicar que o BNG se abstivo na votación porque non se tiveron en consideración as súas propostas.

### **3. APROBACIÓN DUN CONVENIO DE COLABORACIÓN CO CONCELLO DE RIVEIRA PARA A EXECUCIÓN DUN OBRADOIRO DUAL DE EMPREGO.**

O Sr. secretario dá lectura á proposta da Alcaldía, que é do seguinte teor literal:

#### **"PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción da seguinte ACORDO, non obstante resolverá o que estime conveniente:

A Consellería de Economía, Emprego e Industria, por orde do 4 de maio de 2018 aprobou as bases reguladoras das axudas e subvencións para os obradoiros duais de emprego e formación da Comunidade Autónoma de Galicia e procedeu á súa convocatoria para o ano 2018.

O art. 23.1 f) das bases reguladoras das subvencións citadas fixa como un dos criterios de valoración dos proxectos presentados, en orde ao outorgamento da axuda, a agrupación de concellos ao dispor: "*f) Proxectos promovidos por dous ou máis concellos agrupados: 10 puntos. A puntuación deste criterio é incompatible coa indicada no punto anterior [concellos resultantes de fusiões municipais]*".

É dicir, favorécese o alcance supramunicipal do proxecto de obradoiro para o que se solicita a axuda e máis o establecemento de fórmulas de colaboración entre as Entidades Locais do contorno. A acreditación desa colaboración realizarase mediante a sinatura do oportuno convenio de colaboración (art. 19.1 das bases).

Considerando do maior interese para o Concello de Porto do Son o desenvolvemento dun obradoiro de emprego, co fin de facilitar a inserción no mercado laboral dos veciños desempregados, e tendo en conta os criterios de valoración dos proxectos establecidos polas bases, estimouse adecuado

concluir un convenio de colaboración do Concello de Riveira para solicitar unha subvención para desenvolver un obradoiro dual de emprego e para a súa xestión.

Visto canto antecede, **RESOLVE:**

**Único.-** Aprobar a agrupación entre o Concello de Riveira e o Concello de Porto do Son para colaborar na solicitude e execución do Obradoiro de Emprego "Tahume V", ao abeiro da orde do 4 de maio de 2018 pola que se establecen as bases reguladoras das axudas e subvencións para os obradoiros duais de emprego dentro dos programas mixtos de emprego e formación da Comunidade Autónoma de Galicia e se procede á súa convocatoria para o ano 2018, que se rexera polo seguinte convenio:

**"CONVENIO DE COLABORACIÓN ENTRE OS CONCELLOS DE RIVEIRA E PORTO DO SON PARA A EXECUCIÓN DO OBRADOIRO DE EMPREGO " TAHUME V" E SOLICITUDE CONXUNTA DUNHA AXUDA PARA O SEU FINANCIAMENTO AO ABEIRO DA ORDE DO 4 DE MAIO DE 2018 (DOG N° 97 DO 23/05/2018).**

Na Casa do Concello de Riveira, a XX de xuño de 2018.

#### **COMPARECEN**

*D. José Luis Oujo Pouso, Alcalde- Presidente do Concello de Porto do Son, é o seu representante legal consonte ao disposto nos arts. 21.1.b) da Lei 7/1985, do 2 de abril, reguladora das bases de réxime local e 61.1 a) da Lei 5/1997, do 22 de xullo, de Administración Local de Galicia.*

*D. Manuel Ruíz Rivas, Alcalde- Presidente do Concello de Riveira, é o seu representante legal consonte ao disposto nos arts. 21.1.b) da Lei 7/1985, do 2 de abril, reguladora das bases de réxime local e 61.1 a) da Lei 5/1997, do 22 de xullo, de Administración Local de Galicia.*

*Recoñecéndose mutuamente os comparecentes a capacidade legal suficiente para o outorgamento do presente convenio,*

*Da fe do acto, D. Juan Manuel Salguero del Valle, secretario xeral do Concello de Riveira.*

#### **EXPOÑEN**

*I. Que mediante a Orde do 4 de maio de 2018 a Consellería de Economía, Emprego e Industria aprobou as bases reguladoras das axudas e subvencións para os obradoiros duais de emprego da Comunidade Autónoma de Galicia e se procede á súa convocatoria para o ano 2018.*

*II. Que o art. 3 da Orde citada dispón que terán a condición de beneficiarios e poderán promover os proxectos de obradoiros duais de emprego as entidades locais, sempre que sexan competentes para a execución das correspondentes obras ou servizos, dispoñan da capacidade técnica e de xestión suficiente para a realización dos proxectos e teñan unha media de paro rexistrado no ano 2017 superior a 500 persoas no seu ámbito territorial. Así mesmo, o art. 23 da Orde fomenta a presentación de proxectos conxuntos polas entidades locais.*

*III. Que os concellos de Porto do Son e Riveira cumpren cos requisitos establecidos para ter a condición de beneficiarios das subvencións para obradoiros de emprego, e que é do seu interese promover a execución conxunta do proxecto "Obradoiro de Emprego TAHUME V".*



*IV. Que os concellos teñen capacidade xurídica plena para obrigarse, para o cumprimento dos seus fins e no ámbito das súas competencias, consonte ao disposto nos arts. 140 CE, 5 da Lei 7/1985, do 2 de abril, reguladora das bases do réxime local, 111 RD Lexislativo 781/1986, do 18 de abril, texto refundido das disposicións legais vixentes en materia de réxime local e 10, 187 e 193 da Lei 5/1997, de 22 de xullo, de Administración Local de Galicia.*

*Exposto o que antecede e co fin de establecer as condicións de colaboración entre os concellos de Porto do Son e Riveira para a promover o proxecto "Obradoiro de Emprego TAHUME V" e solicitar unha axuda para o seu financiamento ao abeiro da Orde da Consellería de Economía, Emprego e Industria do 4 de maio de 2018, conveñen en obrigarse con arranxo ás seguintes,*

### **CLAUSULAS**

#### **PRIMEIRA.- Obxecto do Convenio.**

*Constitúe o obxecto do presente convenio o establecemento das condicións de colaboración entre os concellos de Porto do Son e Riveira para a promoción e execución do proxecto "Obradoiro de Emprego TAHUME V" e para a solicitude á Consellería de Economía, Emprego e Industria dunha axuda para o seu financiamento, ao abeiro da súa Orde do 4 de maio de 2018 pola que se establecen as bases reguladoras e se convocan as axudas para obradoiros duais de emprego correspondentes ao ano 2018.*

*A solicitude do obradoiro de emprego co nome de "TAHUME V", realizarase conxuntamente entre os concellos de Riveira e Porto do Son, no que se impartirán as especialidades de "Traballos de carpintería e moble (MAMD0209)" e "Actividades auxiliares en conservación e mellora de montes (AGAR0309)"*

*O obradoiro solicitarase para 20 alumnos traballadores, sendo a distribución por concello a seguinte:*

- Concello de Riveira: 10 alumnos- traballadores*
- Concello de Porto do Son: 10 alumnos- traballadores*

*No caso de que sexa concedido o Obradoiro de Emprego, pero o número de alumnos sexa menor ao solicitado, a porcentaxe do reparto será o 50% para o Concello de Riveira e o 50% para o Concello de Porto do Son e se o número resultante non é enteiro, ao Concello de Riveira corresponderalle un alumno máis que ao Concello de Porto do Son.*

*Si debido a esta diminución de alumnos fora necesario modificar o proxecto "Obradoiro de emprego TAHUME V", será necesaria a previa conformidade de ámbolos dous concellos.*

#### **SEGUNDA.- Ámbito de aplicación.**

*O ámbito de aplicación subxectivo e material do presente convenio límitase aos concellos de Porto do Son e Riveira e aos seus termos municipais, respectivamente.*

#### **TERCEIRA.- Obrigas das partes.**

*Os concellos de Porto do Son e Riveira, para a consecución dos fins a que responde o convenio, obríganse a:*

- Adoptar os acordos necesarios para a aprobación do proxecto do "Obradoiro de emprego TAHUME V" e para a solicitude da subvención para o seu financiamento á Consellería de Economía, Emprego e Industria ao abeiro da súa Orde do 4 de maio de 2018.
- Asumir todas as obrigas detalladas na Orde da Consellería de Economía, Emprego e Industria do 4 de maio de 2018, singularmente as previstas no seu art. 39 e, de xeito específico, a procurar a inserción laboral posterior das persoas desempregadas participantes no proxecto, ben como traballador por conta allea ou ben mediante a súa constitución como traballador autónomo ou por conta propia.
- A por a disposición do proxecto "Obradoiro de Emprego TAHUME V" os inmobles sobre os que este se executará e que se definen na documentación técnica do referido proxecto. A posta a disposición acreditarase mediante certificación expedida pola Secretaría Municipal ou, no seu caso, documento de cesión para o uso público por tempo non inferior a vinte e cinco (25) anos.
- A achegar a documentación necesaria para a execución do proxecto "Obradoiro de Emprego TAHUME V" incluídas, no seu caso, as autorizacións sectoriais pertinentes, e a que sexa necesaria para a solicitude, tramitación e xustificación da subvención regulada na Orde da Consellería de Economía, Emprego e Industria do 4 de maio de 2018.
- A achegar o financiamento preciso para a execución do "Obradoiro de Emprego TAHUME V" con arranxo ao previsto na cláusula cuarta deste convenio.

#### **CUARTA.- Xestión do procedemento de solicitude, tramitación e xustificación da axuda.**

Para os efectos de xestión do procedemento relativo á subvención do proxecto de "Obradoiro de Emprego TAHUME V" o Concello de Riveira solicitará a axuda prevista na Orde da Consellería de Economía, Emprego e Industria do 4 de maio de 2018 e realizará os trámites administrativos necesarios para a súa xestión e xustificación. Para a realización de toda a tramitación precisa, facúltase expresamente ao seu Alcalde- Presidente, D. Manuel Ruiz Rivas.

De acordo co exposto, o Concello de Riveira terá a consideración de beneficiario da subvención que, no seu caso, se outorgue e asumirá a contratación e o custo das retribucións salariais totais (incluída a cotización empresarial á Seguridade Social), por todos os conceptos do persoal contratado (alumnos-traballadores, persoal directivo, docente e de apoio) en desenvolvemento do obradoiro de emprego "TAHUME V", tendo a consideración de entidade empregadora.

Sen prexuízo do indicado, o grupo de traballo mixto a que se refire o art. 10 da Orde da Consellería de Economía, Emprego e Industria do 4 de maio de 2018 estará integrado por persoal dos dous concellos en igual número.

O financiamento dos custos necesarios para a execución do proxecto que non sexan subvencionados, incluídos os necesarios para a solicitude da subvención, farase efectivo consonte ás seguintes regras:

- Cada concello comprométese a dotar os créditos orzamentarios necesarios para asumir a totalidade dos gastos non comúns do proxecto, entendendo por tales os correspondentes a bens ou servizos implantados ou prestados unicamente no seu termo municipal.
- Cada concello asumirá segundo as seguintes porcentaxes os gastos comúns, entendendo por tales os correspondentes a custes de persoal ou bens e servizos non imputables a ningún deles individualmente.
  - Concello de Riveira: 50%
  - Concello de Porto do Son: 50%
- A Dirección do obradoiro de emprego, unha vez finalizado este e atendendo ao proxecto executado, elaborará un informe clasificando os gastos como comúns ou non comúns. Ao



*informe xuntarase relación certificada e copia autenticada das facturas correspondentes presentadas no concello que ten a consideración de beneficiario da subvención.*

- *O Concello de Porto do Son, logo de recibir a documentación indicada no parágrafo que antecede, transferiralle no prazo de un (1) mes desde o remate do obradoiro de emprego ao Concello de Riveira a totalidade da achega económica ao seu cargo.*

*As modificacións do proxecto "Obradoiro de emprego TAHUME V" requirirán da previa aprobación ou conformidade de ámbolos dous concellos.*

*Para o caso de ser precisas para a execución do proxecto autorizacións sectoriais, sen prexuízo de que sexan achegadas polos concellos, facúltase expresamente ao Concello de Riveira e ao seu Alcalde-Presidente para a súa solicitude.*

#### **QUINTA.- Cumprimento do convenio.**

*O incumprimento das obrigas consignadas no convenio por calquera das partes facultará á outra para interromper o seu cumprimento e solicitar a súa resolución, que se producirá automaticamente transcorridos quince (15) días naturais.*

*A resolución do convenio suporá que o concello que non teña a consideración de beneficiario da subvención proceda ao aboamento dos gastos non subvencionados efectivamente realizados nas condicións e prazos previstos na cláusula cuarta.*

#### **SEXTA.- Interpretación do convenio.**

*As dúbidas que poidan xurdir en cumprimento do convenio serán resoltas de mutuo acordo por unha comisión integrada por igual número de vogais de cada concello, designados polos respectivos Alcaldes-Presidentes.*

#### **SÉTIMA.- Vixencia do convenio e causas de extinción.**

*O presente convenio producirá efectos desde a data da súa sinatura e ata o total cumprimento das obrigas que nel se establecen.*

*Ademais de polo transcurso do seu prazo de vixencia, o presente convenio extinguirase polas seguintes causas:*

- 1. Polo non outorgamento da subvención para o obradoiro de emprego conxunto.*
- 2. Pola súa resolución, a instancia de parte ou de mutuo acordo.*

#### **OITAVA.- Réxime xurídico.**

*O presente convenio ten carácter administrativo rexéndose, ademais de polo establecido nas súas cláusulas, polo Dereito Administrativo e, supletoriamente polo Dereito Civil.*

*As cuestións litixiosas que poidan xurdir derivadas do seu cumprimento, interpretación ou resolución serán de coñecemento da Xurisdición Contencioso- Administrativa.*

*En proba de conformidade, os comparecentes asinan por triplicado o presente documento, no lugar e data indicados no encabezado."*

Porto do Son, 8 de xuño de 2018.

O Alcalde- Presidente,  
Asdo. José Luis Oujo Pouso."

Os voceiros dos grupos municipais do PSdG- PSOE e Portodos non fan uso da súa quenda de palabra.

Non habendo intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con cinco (5) abstencións (2 PSdG- PSOE+ 1 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

E non habendo máis asuntos que tratar, de orde da Alcaldía- Presidencia, levántase a sesión, sendo as **21:35 horas** do día **14 de xuño de 2018**, de todo o que se estende a presente acta, da que eu, como secretario dou fe.

O ALCALDE- PRESIDENTE.  
  
Asdo, José Luis Oujo Pouso.

O SECRETARIO, que dá fe.  
  
Asdo. José Manuel González García. \*